

O To'atūgā ua Fa'ava'atu'ia ai le Avea o Tama'ita'i ma Taitai o 'Āiga, Nuu ma Ekalesia i Sāmoa

Silia Pa'usisi Finau, National University of Samoa

'Oto'otoga

E 'ānoa ma tāua tiute o se taitai i pulega ma le mataituina o faatinoga ma atinae i totonu o alalafaga (Iati, 2000). Na amata ona faauluulu pulega ma faamasinoga faalenuu i alii ma faipule (matai) i le 19 seneturi ona o latou sa nafa ma le tausisia o le saogalemu lautele ma le nofo filemu o nuu, ao lei iai se faigamalo tutotonu aloaia (Davidson, 1970). O pulega nuu e aofia ai alii ma tulafale ua faasuafaina e aiga potopoto ma ua resitala i le Faamasinoga o Fanua ma Suafa (Keesing & Keesing, 1956). O le faalapopotoga lenei e faia tulafono, faaiuga ma faasalaga i nuu, ma e mafuli i le itupa o alii.

Olo'o faamauina i le talaaga o Samoa le avea o tamaitai ma taitai i seneturi ua mavae, ao lei oo mai Misionare, ma pulega mai fafo sa faafoeina le atunuu (Gunson, 1987). O nisi o lagisoifua o nei taulagiga, e aofia ai le taitaiga a le atua o taua o Nafanua, faapea foi ma Salamasina, o le uluai Tafaifa na pulea Samoa i le silia ma le 40 tausaga (Meleisea, 1987). O tina ma tamaitai isi tagata na galulue malosi ina ia mautinoa e maua le tutoatasi o le malo o Samoa. Sa faatu le latou mau i le 1930 e tetee atu i le pulega a le malo o Niu Sila, e ui ina o le vaitau tonu lea o le vevela o fevesiaiga (MacQuoid, 1995). Na auina atu e le Mau a Tina ma Tamaitai se tusi i Malo Aafaatasi e lagolago ai le mataupu a le Mau a Alii ma Faipule, ina ia faamatuu mai se Malo Tutoatasi mo Samoa. Na faamanuaina le talosaga lenei ina ua tutoatasi Samoa ia Ianuari aso 1, 1962.

O galuega faatino a tina ma tamaitai e faamaonia ai lo latou lototetele, finafinau ma le sogasoga. E ogatasi ata lafoia nei ma lo latou faalupega o le feagaiga, e pei o alafua faataatitia o le va nonofo o le tuagane ma le tuafafine (MacQuoid, 1995). O aiaiga o le feagaiga lenei e manaomia ai le tuagane e tautua ma puipui lona tuafafine ma lana fanau i le olaga atoa (Holme & Holme, 1992). Na matua faataua e tamaitai le mana o le feagaiga, ma sufi gofie ai o latou lagona e tauave ma faatino matafaioi faataitai. Peitai, o le taunuu mai o misionare ma pulega faakolone, na vaemanu'a ai le tāua o le tulaga faataitai o tamaitai (Schoeffel, 1979). O le vaitaimi foi lenei na atagia ai le amata ona le maopoopo nuu o tamaitai, ma aiavea ai le mamalu o le tulaga o le tamaitai, e pei ona uluai tumuai tutusa i tulaga faataitai ma alii ma faipule. Ua vaai fo'i suiga o taitaiga faaleaganuu ina ua suitulaga tapuaiga ma talitonuga faakerisiano i tapuaiga faaleaganuu (Kamu, 1996).

E le o toe faamamaluina taitaiga faatamaitai ma le o toe amanaia foi se leo o le komiti a tina ma tamaitai i faaiuga fai a le fonu a le nuu i le tele o alalafaga (Quay, 2006). Peitai, e ui ina mafuli le pulega o nuu i alii, ua faaoga e tina ma tamaitai isi avanoa e atiae ai o latou tomai ma agavaa faataitai (Samoa Women Empowerment Project Report, 2015).

O le auga o lenei pepa, o le sailiiliga o to'atūgā ua fa'ava'atu'ia ai le avea o tamaitai ma taitai o 'āiga, nuu ma ekalesia i Sāmoa nei.

'Ano Matā'upu

E tele afioaga ua vaeseugā tapu e papupuni ai tamaitai mai le umia o suafa matai. O le ogaoga o le tapu lenei, ua faauluulumamau ai le tele o aiga potopoto, mai le tofia o ni o latou matai tamaitai. Ua faagasolo pea i tausaga lenei tapu, ma ua talia e le toatele lona talafeagai ma aulape o le aganuu ma le faaSamoa. Ua talitonu foi nisi, o suli tamatane e faasolo i le suafa matai, ao suli tamafafine e faasolo i le suafa augafaapae. O nisi foi o tamaitai, e lilifa lo latou

taofi e onomea i le alii ona tauave mamalu o le suafa matai, ae itiiti lona taua, pe afai o le tamaitai.

E 41 faiganuu i Sāmoa latou te le faatagaina tamaitai e umia suafa matai, atoa ai ma le isi 34 e le fa'amamaluina le auai o matai tamaitai i fonotaga a le nuu (CSS, 2015). O le tulafono mo pulega a nuu i le 1990, na amanaia ai faaletulafono le fa'amalosia o tulafono ma faasalaga e fausia e le fonu a alii ma faipule o alalafaga. E foliga mai la, ua talitonu le toatele, ua agavaa faaletulafono foi ma le tapu mo tamaitai mai le umia o suafa matai.

Na faamauina i le tusigaigoa o le 2011 le itiiti ifo i le 10% o le faitau aofai o Samoa, le aofaiga o matai tamaitai. O le ata lafoia, e ogaoga to'atūgā olo'o taotaomia ai tamaitai i le taumafai atu e avea ma matai o o latou aiga. Na o le toalima faipule tamaitai i le palemene o Samoa, i le taimi na tusia ai le lipoti leni, faatusatusa i le aofai o faipule o le maota fonu e 49. E to'afa na manumalo mai nofoa o o latou itumalo i le faigapalota lautele i le 2016, ma le toatasi na filifili ina ia faamalieina le alafua a Malo Aafaatasi, e tataua ona 10% nofoa mo tamaitai i se paeaiga. O se aofaiga ua maualalo tele le 10% pe a fua i le 48% o tamaitai i le faitau aofai o Samoa. O lona uiga, e itiiti tele le leo o tamaitai i upufai, aemaise o le fausia o tulafono a le malo tutoatasi o Samoa.

O faatuatuaga tetele e tolu i Samoa e pei o le Ekalesia Faapotopotoga Kerisiano i Samoa (LMS), Lotu Metotisi ma le Ekalesia Katoliko (Lotu Pope), latou te le faatagaina tamaitai e ulufale i Kolisi Faafaifeau, pe faauu foi e avea ma failauga o le Talalelei. E faapena foi i tofiga Aoa Fesoasoani i le LMS po o Failauga i le Lotu Metotisi. Pau tofiga e agavaa ai o Tiakono, o le vaega lona tolu lea o pulega o ekalesia. O lona uiga, tasi lea o to'atūgā ua taomia ai tamaitai mai tulaga fa'ata'ita'i. Na mafai ona aliae mai le suesuega leni sa faatinoina i le tausaga e 2015, aafiaga nei o talitonuga faakerisiano (Finau, 2017). E faavae nisi o manatu i le aoaoga a le Aposetolo o Paulo lea e fai mai o le tamā o le ulu o le 'āiga, e pei foi o Iesu Keriso, o le ulu o le ekalesia. Ua fa'atāua ma tausia e tagata le fa'amamaluina o leni talitonuga, aemaise ona o Samoa o tagata lolotu, ma mamafi i talitonuga faalelotu. Ua aafia ai foi ma isi li'o e pei o le aiga, nuu, ma isi faalapotopotoga, 'auā ua tautu lava le filifiliga o taitai i alii, ona o aafiaga i talitonuga faakerisiano. Peitai, o le tasi lea faalupega o le tamaitai Samoa, o le ositaulaga, e pei ona faamauina e Le Tagaloa (1996). E talitonu Williamson (2013), o le nafa leni na muai faamatuu i le atua o taua o Nafanua, ma ua agavaa uma ai tamaitai e tauaveina le matafaioi lea. O le tamaitai i lona tofi ositaulaga e saunia le taulaga o le fanaafiofaamalama, i le taeao sesegi faatoa amata ona suluia le fogaeleele e ave o le la. E fai talosaga i tapuafanua, ilamutu ma atua tau o aiga ina ia puipuia le aiga mai faalavelave tutupu faafuasei, aemaise o le osofaia e fili faalafua, ao faagasolo feau masani o le aso. Na o le tamaitai na te silafia le tali o tatalo, aua olo'o ia te ia le mana e fesootai ai ma mauili o ona tuua oloo lagomau i le fanua. E anoanoai lagisoifua o fesootaiga a le tamaitai ma ona ilamutu ma ona tapuafanua i manaoga o le aiga. E faapena foi ona osi le taulaga i atua tau, pe a sauni le aiga e siitaua. Olo'o fa'apea foi ona faia i le talitonuga faakerisiano lotu o le taeao, ae ua le toe faamamaluina ai le ositaulaga o le tamaitai. Ua agavaa lava soo se tagata matua o le aiga i le tiute lea, ma ua fai le talotaloga i le tafa o ata i le Atua Soifua, ina ia ogatasi ma faatuatuaga faakerisiano. O lona uiga la, ua aveesea foi lea nafa patino mai le tamaitai, ma ua le agavaa ai o se ositaulaga mo faatuatuaga faakerisiano.

O Misionare ma pulega faakolone na afua ai ona faaititia le tāua o le tulaga mamalu o le tamaitai, ma le toe taulagia ai le tele o ona faalupega e pei o le feagaiga, tamasa, ma isi (Kamu, 1996). A fua la i le mau a Kamu atoa ai ma talatuu faaSamoa lea e faamatuala ai le vaitau o taitaiga faatamaitai, o lona uiga, o le 17 seneturi lea faatoa amata ai ona faatamalii mai pulega a alii, ae ua matua malosi, lagolagoina ma talitonuina e le toatele. O matatia matamata tetele a le atua o taua (Nafanua) ma le laveaiga o le Aiga Sa Tagaloa e le tamaitai

o Amoa, ua faamauina i tusitusiga o se faamanatu i tamaitai o le talutalufou ma le lumanai, tulaga maoae na ausia e ia foi taitai tamaitai i aso ua mavae (Fairbairn-Dunlop, 1996). O se faamalosiua lea i tamaitai e agavaa i le tofiga faataitai, ina ia apo ma faaoga avanoa e avea ai ma taitai. O se tasi o to'atugā, ua na ona faalagi o agavaa faataitai o tamaitai, ae ua faaitiitia ma iu lava ina faamutaina ma mou ese atu lona taua (Maiava, 2001).

Na vaivai le malosi o pulega a tamaitai ina ua taunuu mai pulega faakolone ma faamaite ituaiga taitaiga fou ma pulega tutotonu mo atunuu o le pasefika. O lea faiga sa feteenai ma faavae o pulega i faalapotopotoga faaleaganuu i le seneturi e 19 (Feinberg & Watson-Gegeo, 1996). O feteenaiga nei sa avea ma faafitauli i pulega faaleaganuu a le tele o atunuu o le Pasefika. O le isi faafitauli, o le taumafai o misionare e faaleaoga le malosi faaleaganuu sa faatautaia ai pulega o atunuu o le Pasefika i aso anamua (Gustafsson, 1992). O le talitonuga o misionare, o aga faataulaitu ma tu faanuupo. O pulega fou nei latou te le amanaia le lototele o tamaitai olo'o faamauina i tala o le vavau ma tala faafagogo a Samoa. Na afua iinei ona fa'ama'amulu le vaega tele o tamaitai ina ua malosi pulega faataitai a alii.

E lilifa le talitonuga faaSamoa i le faafesootai o tina ma tamaitai ma feau masani o le aiga e pei o le tausia o tagata matutua ma fanau, gasese taumafa, ma fai le tuano'a. O le tasi lea mafua'aga ua manatu ai aiga, ua le agavaa tina ma tamaitai i le tofiga o se matai (Saolotoga, 1995). E foliga mai, o nafa patino nei e tatau ona fa'amamafa le taua e tina ma tamaitai, ae le o le avea ma taitai. Ua o se aga masani e vaaia soo lenei taga, ma e le fua tasi, ae toetoe laugatasia ai le vaega tele o tina ma tamaitai. Ua manatu le toatele, e le tatau ona faaluafesasi le toe aapa o se tina po o se tamaitai i se isi matata e ese atu ai ma ana lava matafaioi faapitoa. O le mafuaaga tonu lea, ua alagata ai ona patino le taitai o se tofi tumau mo alii, aua e malualii ma onomea i le tofiga lea.

O le to'atugā foi lea olo'o fa'ava'atu'ia ai le taumafai o isi tamaitai i tulaga faataitai, i le tele o atunuu o le lalolagi. Fai ma faataitai, o le tele o kamupani i le Lunaite Setete o Amerika, e le faatagaina se tamaitai e taitai, ona o le manatu faapea, e tele taimi e alu i le faatinoga o o latou tiute faatausi aiga, ae le lelei ai le tauavega o tofiga mauululuga nei (Hoobler, Lemmon & Wayne, 2011). E faamatalaina e Simpson (1997) le manatu lenei o se faiga fa'aitū'au, ma o se mailei le faapitoa o tiute fa'atausi'āiga i le tina, ua pa pupuni ai lona agavaa i tofiga o se taitai. Ua faapito foi manū ia Tasi ma faailoga tagata le amanaia na o tomai o alii e avea ai ma taitai, ma o se aganuu taatele ua faigata ona foia i le tele o faalapotopotoga (Schwanke, 2013). E le gata ina ua agavaa na o alii i tulaga faataitai, ae o se aafiaga foi o nisi o tu ma aganuu i nisi o atunuu, le le amanaia o o tomai faataitai o tamaitai. O nisi ia o mafuaaga ua sufi gata ai lagona o nisi o tamaitai e faafetai luitau o le avea ma se taitai (Akao, 2008).

E afua mai le pulega o aiga seia oo i upufai o malo, e matamata tetele le ogaoga o aafiaga o tulafono faaleaganuu, tiute faatina ma talitonuga faakerisiano, i le taumafai a tina ma tamaitai e ausia tulaga faataitai (Finau, 2017). O le tele o faalapotopotoga faaleaganuu ua iloga lelei le eseese o alii ma tamaitai, ma ua faaitiitia le taua o tamaitai i tulagatofi o faalapotopotoga nei (Harris, 1991). Ua fa'amāmāsagia ma mauulalo le tulaga o le tamaitai, ua ta'u fa'atauva'aina ma le agavaa i tofiga faataitai (Eagly & Mladinic, 1994). E manatu nisi o alii e matamata ita i tamaitai, ua taumafai nisi o tamaitai e sosofa le fa, ma sosopo atu i tofi na o alii e talafeagai iai. O le isi foi itu, a tulai se tamaitai i se tulaga o se taitai, o se tulaga e taufa'amata'u ma ta'ufa'atauva'aina ai alii latou te galulue (Broughton & Miller, 2009). Peitai, e le o le manatu lea o le tele o tamaitai ua avea ma taitai. U manatu latou, o se matatia ua ausia, ma o se faamoemoega foi sa tulimatai ia mafai ona oo iai.

E taga tutusa le tulaga olo'o iai tina ma tamaitai Samoa, ma isi foi tamaitai i isi atunuu o le Pasefika. O le atunuu o Toga, e faatauaina ma faaolaola pea le faaauuina o le pule e fai

ai faaiuga a le alii aupito i matua o le fanau. E ui lava ina o se tamaitai le ulumatua o se aiga, e le o ia te ia se malosiaga e fai ai ni faaiuga mo le aiga potopoto. O le ute o le alafua lea, e le agavaa le tamaitai e tautala mo lona aiga i faaiuga fai a le fonu a le nuu (James, 1995). O le faafitauli foi lea olo'o fa'afeagai ma tina ma tamaitai olo'o taumafai i tulaga fa'ata'ita'i i le atunuu o Papua Niu Kini. E atugalua ma popole i aganuu faaituau, aemaise o le paoa pulepuletutu o alii. E matuai iloagofie faiga tau fa'amata'u a alii i tamaitai olo'o umia tofiga taitai i le tele o vaega o le atunuu. O le faigata ona tetee atu i le malosi o le pule a alii taitai, ua faaitiitia pe le maua ai foi ni avanoa o tina ma tamaitai i le faiga o faaiuga. Ua faaauau pea ona asa gata le ala i le pule, ona o le ogaoga o faigata ua taomia ai tina ma tamaitai. Ua le mafai ona lagona o latou leo, e oo lava i nofoaga faitele, ua faapitoa foi o se malae e agavaa iai na o alii e faaali ai o latou manatu (Vali, 2010). O toatuga nei e fesootai ma faia, e pei ona faamamalu i tu ma aga a faalapotopotoga faaleaganuu i atunuu Melanesia, aua e faatonu folau e faia auala e fesootai ai tagata, e oo lava i le faatinoga o o latou tiute ma matafaiaoi (Sanga & Walker, 2005). O le vaega toatele o taitai i faalapotopotoga nei e fa'atāua ai faia, o alii. Fai ma faataitaiga, e toatele atu le aofai o alii e umia suafa matai o Aiga Potopoto nai lo tamaitai i Samoa. O matai alii nei e patino iai le faafoega o aiga, ma o i latou foi o sui auai o le fonu a le nuu, ma nafa ma mataupu tau faamasinoga i totonu o nuu (Village Fono Act 1990). O le fonu a le nuu le faalapotopotoga e sili ona maua lona taua i totonu o le nuu, aua latou te faia tulafono ma faasalaga mo le nofo filemu ma le sologa lelei o tualumaga ma lavasiga uma i le nuu. E aupito i toatele atu alii nai lo tamaitai e auai i le fonu a le nuu (Centre for Samoan Studies, 2014).

E iai le talitonuga, o le taitai na te tauaveina le mana o ona tuua, ma o se suivaia o maua o le aiga i le tulaga faataitai (Sanga & Chu, 2009). O le maua na te faamalosi le mana, e faatamaoigaina ai le taitai o le aiga ma le nuu i le atamai e faatino ai matafaioi o leni tofiga maua, aloaia ma taua (Aiono, 1986). Olo'o tā'ua i le lipoti o le Samoa Millennium Development Goals Progress Report 2010, le itiiti o avanoa e faaoga ai e tamaitai fanua faaleaganuu, ma e le agavaa foi e faatalanoa ni lisi mo fanua nei, e ui ina tutusa lelei le latou aia ma le itupa o alii. Olo'o faamatalaina i le lipoti leni, o le pulea o fanua le isi toatuga e faigata ai i tamaitai ona ausia tulaga faataitai, ona e le auai i le tele o taimi i talanoaga e aafia ai fanua faaleaganuu, aua latou te le umia ni suafa matai. E telē le eseese i tulaga faataitai o alii ma tamaitai i saofaiga a nuu (Schoeffel, 2015). O le mafuaaga tonu lea ua taumafai ai le suesuega leni e faapupula i le paia ma le mamalu oloo alala ma papaaao i afioaga eseese, e aia tutusa alii ma tamaitai i tofiga taitai, aemaise i le avefa ma matai o se aiga potopoto, e pei ona faamatala mai e le faavae o le Malo Tutoatasi o Samoa.

Fa'ai'uga

E tataua ona agavaa tagata uma e auai ma lotolotoi i faaiuga fai, aemaise i vaega taotaomia e pei o le itupa o tina ma tamaitai (Haider, 2009). E lagolagoina malosi le mau leni e Freire, (1983) i lona talitonuga, o le aia tataua a tagata uma le auai i faiga o faaiuga, ma talanoa faatasi i mataupu e aafia uma ai tagata. Talu ai o tulaga faataitai e le o se faamanuiaga faapitoa mo se ituaiga tagata po o se tagata foi se toatasi, o le mafuaaga lea e fautuaina ai le fausia o se tulafono e agavaa uma ai tagata e faaali saoloto o latou lagona i faaiuga fai o aiga, nuu ma ekalesia. E tumau pea le papupuni o tamaitai e umia suafa matai o aiga, pe afai e leai se tulafono e soloia ai tapu a le 41 o nuu mavae i Samoa, e le o faatagaina tamaitai e suafa matai. O le malosiaga foi lea e faamuta ai le le amanaia o le auai o tamaitai ua suafa matai e le isi 34 nuu mavae i Samoa. E iai le naunautaiga o leni suesuega, o se avanoa foi lea e mafai ai e ekalesia ona faamatu nisi o tofiga taitai i tamaitai, e pei o le avefa ma failauga e folafolaina le Talalelei. O le faiga lea ua laa iai ekalesia faapotopotoga kerisiano i Amerika, Europa ma Peretania, ao leni lava e taofiofimamau faaululuga o le lotu i Samoa e tapu tamaitai mai le avefa ma faifeau. E talitonu nisi, o le pulega e faaululu i alii na faaulufale mai

e Misionare i le 1830, ma ua faaaauu pea e tagata Samoa ona faataua e amata mai le lotoifale o le aiga, seia oo atu i le lio o le nuu, atunuu ma ekalesia. Olo’o faamauina e Schoeffel (1979), na matuai tulaga ese le ituaiga pulega lea ina ua faaofi mai i Samoa, aua ao lei taunuu mai misionare, sa tumuai tutusa lava le alii taua ma ona tuafafine i tulaga mamalu ma aloaia.

E le tau faamatalaina sao taua o tina ma tamaitai i le atinae o nuu, alalafaga ma ekalesia. E maumaututu le talitonuga o le vaega tele o tina, ua mafai ona ausia tapulaa nei ona o le faaogaina o o latou tomai ma agavaa faataitai.

O fa’amatalaga na tuufaatasia mai fa’atalanoaga, mataituina o galuega i nisi o komiti a tina ma tamaitai ma le iloiloga o lipoti ma iuga o nisi o suesuega, na aliae mai ai le mafuli o finagalo faaalai i faaiuga nei. O to’atūgā ua fa’ava’atu’ia ai le avea o tamaitai ma taitai o aiga, nuu ma ekalesia, ona o tulafono a nisi o nuu ua tapu ai tamaitai ona umia suafa matai ma lē amanaia lo latou auai i fonotaga a nuu, o talitonuga faalelotu o le tama o le ulu o le aiga, ma talitonuga o le toatele o tagata e onomea alii i tulaga faataitai, ae le o tamaitai. O le tapu o tamaitai ona avea ma matai o o latou aiga, ua le mafai ai ona agavaa e tauva i faigapalota lautele mo sui o le palemene. Ua le avanoa tamaitai i tofiga faafaifeau, ma faamamaluina pea le lagolago a le toatele o le atunuu i le avea o alii ma taitai. E iai le faamoemoega, o le tali o faafitauli olo’o fa’ava’atu’ia ai le taumafai o nisi o tamaitai e avea ma taitai, o se tulafono mo ’āiga, nuu ma ekalesia, e mafai ai ona matala ia Sega le tele o to’atūgā ua saisaitia ai tamaitai e agavaa i tofiga fa’ata’ita’i.

Puna’oa

- Aiono, F. 1986. “Western Samoa: The sacred covenant.” Pp. 102-109. *In land rights of Pacific women*, Suva, Fiji: Institute of Pacific Studies, University of the South Pacific.
- Akao, S. M. 2008. “Seen but not heard: Women’s experiences of educational leadership in Solomon Island Secondary Schools.” Thesis, Master of Educational Leadership (MEd Leadership), Hamilton, New Zealand: University of Waikato.
- Broughton, A., & Miller, L. 2009. Women in senior management: Is the glass ceiling still intact. *The Journal of Industrial Relations & Human Resources* 11(4):7-23. Doi: 10.4026/1303-2860.2009.0122.x
- Centre for Samoan Studies. 2014. Village Government in Samoa: Do Women Participate? Toomatagi: National University of Samoa. <http://samoanstudies.ws/wp-content/uploads/2014/07/Village-Government-in-Samoa.pdf> (accessed 7 September 2020).
- Davidson, J. 1970. *Samoa 1830 to 1900: The politics of a multi-cultural community (Vol.1)*. Sydney: Halstead Press.
- Eagly, A., & Mladinic, A. 1994. Are people prejudiced against women? Some answers from research on attitudes, gender stereotypes, and judgments of competence. *European Review of Social Psychology* 5(12):35.
- Fairbarn-Dunlop, P. 1996. *Tamaitai Samoa: Their stories*. Suva, Fiji: Institute of Pacific Studies, University of the South Pacific, KIN Publications.
- Feinberg, R., & Watson-Gegeo, K. A. 1996. *Leadership and change in the Western Pacific*. London: Athlone Press.
- Finau, S. P. 2017. *Women’s leadership in traditional villages in Samoa: the cultural, social, and religious challenges*. PhD Thesis. Wellington, New Zealand, Victoria University of Wellington.
- Freire, P. 1983. *The pedagogy of the oppressed*. New York: Seabury Press.
- Gunson, N. 1987. Sacred women chiefs and female headmen in Polynesian history. *Journal of Pacific History* 22(3):139.

- Haider, H. 2009. *Community-based approaches to peace-building in conflict-affected and fragile contexts*. Birmingham: Governance and Social Development Resource Centre, University of Birmingham.
- Harris, M. 1991. *Cultural anthropology (3rd ed)*. Harper Collins: New York.
- Hoobler, J. M., Lemmon, G., & Wayne, S. J. 2011. Women's under-representation in upper management: New insights on a persistent problem. *Organizational Dynamics (40)*:151-156.
- Iati, I. 2000. "The good governance agenda for civil society: Implications for the fa'aSamoa." Pp.67-77 in *Governance in Samoa: Pulega i Samoa*, eds. E. Huffer & A. So'o. Canberra: Asia Pacific Press.
- James, K. 1995. "Rank overrules everything: Hierarchy, social stratification, and gender in Tonga." P. 122 in *Tonga and Samoa: Images of gender and polity*. ed. J. Hunstman. Christchurch, New Zealand: Centre for Pacific Studies, Macmillan Brown.
- Kamu, L. 1996. *The Samoan culture and the Christian gospel*. Apia, Samoa: Government Printing Press.
- Keesing, F. M., & Keesing, M. M. 1956. *Elite communication in Samoa: A study of leadership (Vol.3)*. Standford, CA: Standford University Press.
- Le Tagaloa, F. 1996. *O motuga-afa*. Apia, Samoa: Le Lamepa Press.
- MacQuoid, L. P. 1995. *The Women's Mau: Female peace warriors in Western Samoa*. Master of Pacific Studies, University of Hawaii, Honolulu. <http://hdl.handle.net/10125/21186> (accessed 7 September 2020).
- Maiava, S. 2001. *A clash of paradigms: Intervention, response, and development in the South Pacific*. Aldershot, England: Ashgate Publishing Limited.
- Meleisea, M. 1987. *The making of modern Samoa: Traditional authority and colonial administration in the history of Western Samoa*. Suva, Fiji: Institute of Pacific Studies, University of the South Pacific.
- Sanga, K., & Chu, C. 2009. *Living and leaving a legacy of hope: Stories by new generation Pacific Leaders*. Wellington: Institute for Research and Development in Maori and Pacific Education, Victoria University of Wellington.
- Sanga, K., & Walker, K. D. 2005. *Ape moa: Solomon Islands Leadership*. Wellington: Institute for Research and Development in Maori and Pacific Education, Victoria University of Wellington.
- Saolotoga, F. S. M. 1995. *Feminism and the changing roles of women in society and the church in Samoa*. Master's Thesis. Suva, Fiji: Pacific Theological College.
- Schoeffel, P. 1979. Daughters of Sina: A study of gender, status, and power in Western Samoa. Unpublished dissertation, Australian National University, Canberra, Australia.
- Schoeffel, P. 1995. The Samoan concept of feagaiga and its transformation. Pp. 85-105; 122 in *Tonga and Samoa: Images of gender and polity*. ed. J. Hunstman. Christchurch, New Zealand: Centre for Pacific Studies, Macmillan Brown.
- Schoeffel, P. 2015. Interpretations of tradition that hold back Samoan women leaders. <http://www.radionnz.co.nz/international/programmes/datelinepacific/audio/201762382/> (accessed 7 September 2020).
- Schwanke, D. A. 2013. Barriers for women to positions of power: How societal and corporate structures, perceptions of leadership, and discrimination restrict women's advancement to authority. *Earth Common Journal 3(2)*:1-2.
- Simpson, R. 1997. Have times changed? Career barriers and the token woman manager. *British Journal of Management, 8(1)*:121-130.
- Williamson, R. W. 2013. *The social and political systems of Central Polynesia (Vol.2)*. London: Cambridge University Press